



SLUŽBENE NOVINE

KANTONA SARAJEVO

Godina XIII – Broj 39

Četvrtak, 4. decembra 2008. godine
SARAJEVO

ISSN 1512-7052

KANTON SARAJEVO

Skupština Kantona

Na osnovu člana 18. stav (1) tačka b) Ustava Kantona Sarajevo („Službene novine Kantona Sarajevo“, br. 1/96, 2/96, 3/96, 16/97, 14/00, 4/01 i 28/04) i člana 27. stav (2) Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije Bosne i Hercegovine“, br. 39/03 i 22/06), na prijedlog Vlade Kantona Sarajevo, Skupština Kantona Sarajevo je na sjednici, održanoj 4. decembra 2008. godine, donijela

ZAKON

O NADLEŽNOSTIMA ORGANA VLASTI KANTONA SARAJEVO U OBLASTI ZAŠTITE I SPAŠAVANJA LJUDI I MATERIJALNIH DOBARA OD PRIRODNIH I DRUGIH NESREĆA

POGLAVLJE I OSNOVNE ODREDBE

Član 1.

(Opseg primjene u odnosu na subjekte)

Ovim Zakonom, u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije Bosne i Hercegovine“, br. 39/03 i 22/06 – u daljnjem tekstu: Zakon o zaštiti i spašavanju), uređuje se nadležnost kantonalnih organa vlasti u odnosu na poslove u oblasti zaštite i spašavanja ljudi, biljnog i životinjskog svijeta, materijalnih, kulturnih, historijskih i drugih dobara i okoliša (u daljnjem tekstu: ljudi i materijalna dobra) od prirodnih nepogoda, tehničko-tehnoloških, ekoloških i drugih nesreća ili ratnih opasnosti (u daljnjem tekstu: prirodne i druge nesreće), koje prema Zakonu o zaštiti i spašavanju spadaju u nadležnost kantona i lokalnih organa vlasti i način obavljanja tih poslova na području Kantona Sarajevo (u daljnjem tekstu: Kanton).

Član 2.

(Opseg primjene u odnosu na objekt)

(1) Kanton osigurava izgradnju jedinstvene organizacije zaštite i spašavanja na području Kantona, u skladu sa ovim Zakonom i drugim propisima, planovima i drugim dokumentima kojima se uređuju pitanja organizovanja, razvoja, pripremanja i upotrebe snaga i sredstava namijenjenih za zaštitu i spašavanje ljudi i materijalnih dobara od prirodnih i drugih nesreća.

(2) Svi vidovi zaštite od prirodnih i drugih nesreća organizuju se i provode u skladu sa načelima međunarodnog humanitarnog prava i međunarodnog prava o zaštiti ljudi i materijalnih dobara od prirodnih i drugih nesreća, kao i preuzetim međunarodnim obavezama.

POGLAVLJE II PRAVA I DUŽNOSTI KANTONALNIH ORGANA

Član 3. (Nadležnost Skupštine)

Skupština Kantona Sarajevo (u daljnjem tekstu: Skupština Kantona) na prijedlog Vlade Kantona Sarajevo (u daljnjem tekstu: Vlada Kantona) u oblasti zaštite i spašavanja:

- a) donosi Zakon o nadležnostima organa vlasti Kantona Sarajevo u oblasti zaštite i spašavanja ljudi i materijalnih dobara od prirodnih i drugih nesreća,
- b) donosi Program razvoja zaštite i spašavanja od prirodnih i drugih nesreća u Kantonu Sarajevo (u daljnjem tekstu: kantonalni Program razvoja),
- c) donosi i druge propise iz oblasti zaštite i spašavanja u skladu sa Zakonom o zaštiti i spašavanju, ovim Zakonom i drugim propisima.

Član 4. (Nadležnost Vlade)

Vlada Kantona u oblasti zaštite i spašavanja:

- a) donosi Procjenu ugroženosti od prirodnih i drugih nesreća u Kantonu Sarajevo (u daljnjem tekstu: Procjena ugroženosti),
- b) predlaže kantonalni Program razvoja,
- c) donosi Plan zaštite i spašavanja od prirodnih i drugih nesreća Kantona Sarajevo (u daljnjem tekstu: kantonalni Plan zaštite),
- d) razmatra stanje priprema za zaštitu i spašavanje u Kantonu i donosi mjere za organizovanje, razvijanje i jačanje civilne zaštite u Kantonu,
- e) donosi propise o organizovanju i funkcionisanju civilne zaštite Kantona, u skladu sa Zakonom o zaštiti i spašavanju, ovim Zakonom i drugim propisima,
- f) na prijedlog Kantonalnog štaba civilne zaštite (u daljnjem tekstu: Kantonalni štab), proglašava stanje prirodne i druge nesreće na području Kantona i naređuje upotrebu snaga i sredstava civilne zaštite, organa uprave, privrednih društava i drugih pravnih lica na području Kantona na prevenciji, ublažavanju i otklanjanju štetnih posljedica po ljude i materijalna dobra,
- g) uređuje pitanja finansiranja zaštite i spašavanja i osigurava potrebna finansijska sredstva u Budžetu Kantona za finansiranje potreba zaštite i spašavanja iz nadležnosti Kantona,
- h) donosi akte o osnivanju Kantonalnog štaba, postavljanju Komandanta i Načelnika Kantonalnog štaba i određivanju funkcija u kantonalnim ministarstvima, Kantonalnoj upravi civilne zaštite (u daljnjem tekstu: Kantonalna uprava), i drugim organima uprave čiji su nosioci po položaju članovi Kantonalnog štaba,
- i) određuje pravna lica i udruženja od kojih će se organizovati službe zaštite i spašavanja, koje će djelovati na području Kantona,
- j) u alarmantnim situacijama postojeće institucije i službe djeluju u punom kapacitetu, a

situacija automatizmom pokreće proces osnivanja institucija koje će se u budućnosti baviti specifičnim problemima,

- k) na prijedlog Kantonalne uprave, osniva jedinice civilne zaštite specijalizovane-interventne namjene u Kantonu,
- l) obavlja i druge poslove zaštite i spašavanja u skladu sa zakonom i drugim propisima.

Član 5.

(Nadležnost ministarstava i drugih organa uprave)

Kantonalna ministarstva i drugi organi uprave Kantona, u okviru svog djelokruga, u oblasti zaštite i spašavanja:

- a) organizuju, planiraju i osiguravaju provođenje preventivnih mjera zaštite za zaštitu vlastitog ljudstva, materijalnih sredstava i objekata koje koriste u svom radu,
- b) ostvaruju stalnu saradnju i koordinaciju sa federalnim ministarstvima i drugim organima uprave u Federaciji BiH, u provođenju preventivnih mjera zaštite i spašavanja, kao i provođenju operativnih mjera kada nastane stanje prirodne i druge nesreće na području Kantona i Federacije BiH,
- c) učestvuju u izradi Procjene ugroženosti, kantonalnom Programu razvoja i kantonalnom Planu zaštite, u pitanjima iz oblasti za koju su osnovani i u okviru svoje redovne djelatnosti realizuju zadatke koji se za njihove oblasti utvrde u tim dokumentima,
- d) provode mjere zaštite i spašavanja ljudi i materijalnih dobara iz svog područja, a naročito mjere koje naredi Kantonalni štab, koje se odnose na angažovanje službi zaštite i spašavanja, privrednih društava i drugih pravnih lica u zaštiti i spašavanju,
- e) obavještavaju Kantonalnu upravu o podacima koji su od značaja za planiranje, organizovanje i provođenje zaštite i spašavanja ljudi i materijalnih dobara iz nadležnosti Kantona, te ostvaruju stalnu saradnju sa Kantonalnom upravom u rješavanju svih pitanja od značaja za planiranje, organizovanje i provođenje zaštite i spašavanja ljudi i materijalnih dobara iz nadležnosti Kantona,
- f) ostvaruju stalnu saradnju i pružaju stručnu pomoć opštinskim službama za upravu i službama civilne zaštite opština u smislu osiguranja svih potrebnih podataka iz svoje nadležnosti pri izradi procjena ugroženosti, programa razvoja zaštite i spašavanja, planova zaštite i spašavanja, kao i svih drugih planskih dokumenata koji se izrađuju na nivou opština, kao i realizovanju zadataka utvrđenih u tim programima i planovima,
- g) učestvuju u izradi elaborata za izvođenje zajedničkih i samostalnih vježbi zaštite i spašavanja,
- h) obavljaju i druge poslove u području zaštite i spašavanja, u skladu sa zakonom, drugim propisima i opštim aktima.

Član 6.

(Nadležnost Kantonalne uprave)

(1) Upravne, stručne i druge poslove iz oblasti zaštite i spašavanja iz nadležnosti Kantona vrši Kantonalna uprava, kao samostalni organ uprave u Kantonu.

(2) Kantonalna uprava, iz oblasti zaštite i spašavanja obavlja slijedeće poslove:

- a) organizuje, priprema i prati funkcionisanje zaštite i spašavanja na području Kantona,
- b) izrađuje Procjenu ugroženosti,
- c) priprema kantonalni Program razvoja,

- d) predlaže kantonalni Plan zaštite,
- e) prati stanje priprema zaštite i spašavanja i predlaže mjere za unapređenje organizacije i osposobljavanja civilne zaštite Kantona i opština,
- f) organizuje i koordinira provođenje mjera zaštite i spašavanja te organizuje i provodi poslove zaštite od požara i vatrogastvo,
- g) organizuje, prati i realizuje obuke nosilaca civilne zaštite,
- h) predlaže programe zajedničkih i samostalnih vježbi i izradu elaborata za izvođenje vježbi pripadnika civilne zaštite, organa uprave, privrednih društava i drugih pravnih lica iz područja zaštite i spašavanja,
- i) organizuje Kantonalni operativni centar civilne zaštite (u daljnjem tekstu: Kantonalni operativni centar) u Kantonu i osigurava njegovo funkcionisanje,
- j) predlaže i preduzima mjere za popunu ljudstvom Kantonalnog štaba civilne zaštite, jedinica civilne zaštite i službi zaštite i spašavanja, te njihovo opremanje materijalno-tehničkim sredstvima,
- k) priprema propise iz područja zaštite i spašavanja iz nadležnosti Kantona,
- l) organizuje i provodi obuku stanovništva i pruža pomoć službama civilne zaštite opština u obavljanju poslova u njihovoj nadležnosti,
- m) obavlja inspekcijski nadzor iz područja zaštite i spašavanja,
- n) vodi propisane evidencije i obavlja druge poslove zaštite i spašavanja, u skladu sa zakonom, drugim propisima i opštim aktima.

POGLAVLJE III – ORGANIZOVANE STRUKTURE CIVILNE ZAŠTITE

Član 7.

(Kantonalni štab)

Za upravljanje akcijama zaštite i spašavanja na području Kantona, te za obavljanje drugih poslova u zaštiti i spašavanju, u skladu sa Zakonom o zaštiti i spašavanju, ovim Zakonom i drugim propisima, osniva se Kantonalni štab, kao stručno-operativni organ. Kantonalni štab osniva Vlada Kantona. Kantonalni štab funkcionise u miru samo onda kada nadležni organ proglasi da je nastalo stanje prirodne i druge nesreće na području Kantona ili Federacije BiH, odnosno kada treba preventivno djelovati prije nastanka prirodne i druge nesreće, te za vrijeme vježbi civilne zaštite, a u ratu funkcionise stalno.

Član 8.

(Postavljenja i razrješenja u Kantonalnom štabu)

Komandanta, Načelnika i članove Kantonalnog štaba, postavlja i razrješava Vlada Kantona. Ministar za prostorno uređenje i zaštitu okoliša u Vladi Kantona, po položaju, jeste Komandant Kantonalnog štaba, a Direktor Kantonalne uprave, po položaju, jeste Načelnik Kantonalnog štaba. Sekretar Crvenog križa Kantona Sarajevo je po funkciji član Kantonalnog štaba. Za članove Kantonalnog štaba postavljaju se pomoćnici ministara i drugi rukovodeći državni službenici iz kantonalnih ministarstava i drugih kantonalnih organa uprave i državni službenici Kantonalne uprave, u skladu sa aktom o unutrašnjoj organizaciji Kantonalnog štaba, kojeg donosi Vlada Kantona na prijedlog Kantonalne uprave.

Član 9.
(Nadležnosti Kantonalnog štaba)

U upravljanju akcijama zaštite i spašavanja Kantonalni štab obavlja slijedeće poslove:

- a) odlučuje o upotrebi snaga i sredstava civilne zaštite na zaštiti i spašavanju ugroženih i nastradalih ljudi i materijalnih dobara i te snage raspoređuje na ona područja koja su ugrožena,
- b) nalaže provođenje odgovarajućih mjera zaštite i spašavanja i određuje snage i sredstva koje će provoditi te mjere,
- c) usmjerava, koordinira i upravlja akcijama zaštite i spašavanja svih učesnika angažovanih na zaštiti i spašavanju na svom području,
- d) tokom provođenja akcija zaštite i spašavanja dužan je provoditi odluke i naređenja Federalnog štaba civilne zaštite,
- e) nalaže opštinskim štabovima civilne zaštite, štabovima civilne zaštite pravnih lica u kojima su ti štabovi osnovani i službama zaštite i spašavanja koje osniva Vlada Kantona da učestvuju u preduzimanju mjera i aktivnosti na zaštiti i spašavanju na određenom području,
- f) nalaže angažovanje snaga i sredstava civilne zaštite sa područja jedne opštine na ugroženo područje druge opštine na području Kantona,
- g) u vršenju poslova iz svoje nadležnosti donosi odgovarajuće akte,
- h) predlaže Vladi Kantona proglašenje stanja prirodne ili druge nesreće,
- i) rješava sva pitanja koja se u toku provođenja aktivnosti na zaštiti i spašavanju pojave u vezi angažovanja snaga i sredstava civilne zaštite i provođenja mjera zaštite i spašavanja i samozaštite građana.

Član 10.
(Povjerenici civilne zaštite)

Povjerenici civilne zaštite su organizovane snage civilne zaštite i način njihovog organizovanja i funkcionisanja, kao i njihova osnovna prava i dužnosti, odnosno mjesto i uloga u sistemu zaštite i spašavanja regulisani su Zakonom o zaštiti i spašavanju i Pravilnikom o načinu rada i funkcionisanja štabova i povjerenika civilne zaštite („Službene novine Federacije Bosne i Hercegovine“, br. 77/06 i 5/07).

Član 11.
(Službe zaštite i spašavanja)

Službe zaštite i spašavanja su poseban organizovani oblik civilne zaštite čije je organizovanje, funkcionisanje, kao i njihova nadležnost i način rada propisan Zakonom o zaštiti i spašavanju i Pravilnikom o organizovanju službi zaštite i spašavanja i jedinica civilne zaštite, njihovim poslovima i načinu rada („Službene novine Federacije Bosne i Hercegovine“, broj 77/06).

Član 12.
(Jedinice civilne zaštite)

(1) Jedinice civilne zaštite su glavna organizovana snaga civilne zaštite i one se osnivaju, opremaju i osposobljavaju kao operativne snage radi neposrednog angažovanja na izvršavanju zadataka zaštite i spašavanja ljudi i materijalnih dobara od prirodnih i drugih nesreća, kao i otklanjanja posljedica nastalih djelovanjem tih nesreća.

(2) Jedinice civilne zaštite osnivaju se kao jedinice opšte i specijalizovane namjene u skladu sa odredbama Zakona o zaštiti i spašavanju i Pravilnika o organizovanju službi zaštite i spašavanja i jedinica civilne zaštite, njihovim poslovima i načinu rada („Službene novine Federacije Bosne i Hercegovine“, broj 77/06).

POGLAVLJE IV – ORGANIZOVANJE ZAŠTITE I SPAŠAVANJA U GRADU SARAJEVU I OPŠTINAMA NA PODRUČJU KANTONA

Član 13. (Nadležnost Grada)

Opštine koje čine Grad Sarajevo (u daljnjem tekstu: Grad), ukoliko ocjene da je potrebno, mogu određena pitanja iz oblasti zaštite i spašavanja, koja su od zajedničkog interesa za te opštine, prenijeti na Grad, u skladu sa Zakonom o zaštiti i spašavanju i ovim Zakonom.

Član 14. (Nadležnost opštine)

(1) Opštine na području Kantona su dužne organizovati vršenje svih poslova zaštite i spašavanja koji su Zakonom o zaštiti i spašavanju stavljeni u nadležnost opština, kao i poslove koji se za opštine na području Kantona utvrde u kantonalnom Programu razvoja i kantonalnom Planu zaštite i drugim aktima Kantona.

(2) Za vršenje upravnih, stručnih i drugih poslova zaštite i spašavanja iz nadležnosti opština formira se opštinska služba civilne zaštite, koja ima status opštinske službe za upravu, čija se nadležnost utvrđuje u skladu sa Zakonom o zaštiti i spašavanju i ovim Zakonom.

(3) Službe civilne zaštite opština na području Kantona ostvaruju stalnu saradnju sa Kantonalnom upravom u svim pitanjima od zajedničkog interesa.

Član 15. (Nadležnost opštinskog štaba)

(1) Za upravljanje akcijama zaštite i spašavanja na području opština u Kantonu, te za obavljanje drugih poslova u zaštiti i spašavanju, u skladu sa Zakonom o zaštiti i spašavanju, ovim Zakonom i drugim propisima, osniva se opštinski štab civilne zaštite (u daljnjem tekstu: opštinski štab), kao stručno operativni organ opštine. Opštinski štab osniva opštinsko vijeće, na prijedlog opštinskog načelnika.

(2) Opštinski štab funkcionise u miru samo onda kada načelnik opštine proglasi da je nastalo stanje prirodne i druge nesreće, odnosno kada prijete direktna opasnost od nastanka prirodne i druge nesreće ili kada treba preventivno djelovati prije nastanka prirodne i druge nesreće, te za vrijeme vježbi civilne zaštite, a u ratu funkcionise stalno.

Član 16. (Proglašenje prirodne ili druge nesreće u opštini)

(1) Kada prirodna ili druga nesreća nadilazi mogućnosti djelovanja službi, organa i organizacija na području opština u Kantonu, koje se u okviru svoje redovne djelatnosti bave zaštitom i spašavanjem ljudi i materijalnih dobara od prirodnih i drugih nesreća, načelnik opštine, na prijedlog opštinskog štaba, proglašava stanje prirodne ili druge nesreće.

(2) Bliže kriterije za proglašenje stanja prirodne ili druge nesreće propisuju opštine na području Kantona svojim aktom.

Član 17.
(Nadležnost opštinskih organa)

Opštine na području Kantona su dužne svojim propisom utvrditi nadležnost opštinskog vijeća, opštinskog načelnika, opštinskih službi za upravu, službe civilne zaštite opštine i opštinskog štaba u oblasti zaštite i spašavanja, koja su Zakonom o zaštiti i spašavanju i ovim Zakonom stavljena u nadležnost opštine.

POGLAVLJE V – OPERATIVNI CENTAR CIVILNE ZAŠTITE

Član 18.
(Razlozi osnivanja i namjena operativnih centara civilne zaštite)

(1) Radi stalnog prikupljanja podataka o svim vrstama pojava i opasnosti koje mogu dovesti do prirodne ili druge nesreće, kao i podataka o posljedicama koje su nastale pojavom prirodne ili druge nesreće po ljude i materijalna dobra na ugroženom području, obradu tih podataka i njihove distribucije nadležnim organima vlasti i pravnim licima, kao i prenošenje naređenja štabova civilne zaštite u vrijeme funkcionisanja tih štabova osnivaju se operativni centri civilne zaštite (u daljnjem tekstu: operativni centar).

(2) Kantonalni operativni centar osniva se u sastavu Kantonalne uprave, a opštinski operativni centri u sastavu opštinskih službi civilne zaštite.

Član 19.
(Uslovi za rad operativnih centara)

Za rad operativnih centara moraju se osigurati neophodni uslovi koji se odnose na prostor, materijalno-tehnička sredstva i opremu što se vrši prema odredbama čl. 8. do 11. Pravilnika o organizovanju i funkcionisanju operativnih centara civilne zaštite („Službene novine Federacije Bosne i Hercegovine“, broj 8/07 – u daljnjem tekstu: Pravilnik o funkcionisanju operativnih centara).

Član 20.
(Nadležnost Kantonalnog operativnog centra)

Kantonalni operativni centar nadležan je za vršenje slijedećih poslova:

- a) prikuplja i obrađuje sve podatke i informacije o prirodnim i drugim nesrećama na području Kantona i te podatke dostavlja nadležnim organima Kantona i Federalnom operativnom centru na način predviđen Pravilnikom o funkcionisanju operativnih centara,
- b) prenosi naređenja Federalnog i Kantonalnog štaba u vrijeme kada ti štabovi rukovode akcijama zaštite i spašavanja na području Kantona,
- c) prima, priprema i šalje nadležnim organima Kantona izvještaje o mjerama i aktivnostima koje se preduzimaju u toku provođenja akcija na zaštiti i spašavanju na području Kantona,

- d) ostvaruje stalni kontakt sa Federalnim operativnim centrom i postupa po nalogima i zahtjevima tog Centra, kao i opštinskim operativnim centrima na području Kantona u vezi prikupljanja i međusobnoj razmjeni podataka o prirodnim i drugim nesrećama na području Kantona,
- e) prenosi saopštenja javnim medijima Kantona o podacima koji se odnose na prirodne i druge nesreće sa kojima raspolaže,
- f) vrši primanje i prenošenje informacija za potrebe timova za deminiranje Kantona,
- g) provodi odgovarajuće mjere na organizovanju i funkcionisanju opštinskih operativnih centara na području Kantona i u tim pitanjima tim centrima pruža odgovarajuću stručnu pomoć i obuku pripadnika tih centara,
- h) vrši i sve druge poslove koji se odnose na prikupljanje, obradu i distribuciju podataka i informacija o prirodnim i drugim nesrećama na području Kantona, kao i druge poslove koji se zakonom i drugim propisima stave u nadležnost Kantonalnog operativnog centra.

Član 21.

(Radno vrijeme Kantonalnog operativnog centra)

Radno vrijeme Kantonalnog operativnog centra određuje se prema odredbama člana 151. Zakona o zaštiti i spašavanju, kojim je određeno da Kantonalni operativni centar ima najmanje pet izvršilaca i radi neprekidno 24 sata svaki dan i u miru i za vrijeme postojanja stanja prirodne ili druge nesreće na području Kantona, odnosno Federacije Bosne i Hercegovine.

Član 22.

(Poseban telefonski broj)

Javna i druga preduzeća za telekomunikacije su, u skladu sa Zakonom o zaštiti i spašavanju, na području Kantona, dužna osigurati besplatno pozivanje posebnog broja **121** u Kantonalnom operativnom centru, putem kojeg građani mogu u svakom trenutku tom Centru dostaviti informacije (podatke) o svim vrstama opasnosti i pojavama koje mogu dovesti do nastanka prirodne i druge nesreće koje primijete ili za koje saznaju, odnosno podatke o nastradalim ili ugroženim ljudima od bilo koje opasnosti i nesreće, s tim što će nakon međunarodnog uvezivanja Bosne i Hercegovine u sistem **112**, javna i druga preduzeća za telekomunikacije biti dužna osigurati odgovarajuće uvezivanje tog broja s Kantonalnim operativnim centrima.

POGLAVLJE VI – OBUČAVANJE, OSPOSOBLJAVANJE, PROGRAMIRANJE I PLANIRANJE

Član 23.

(Obučavanje i osposobljavanje)

(1) Radi sticanja stručnih znanja i vještina za zaštitu i spašavanje građani su dužni obučavati se i osposobljavati.

(2) Obučavanje građana za ličnu i uzajamnu zaštitu može se vršiti i putem sredstava masovnog informisanja (radio, TV) i na drugi pogodan način.

(3) Pripadnici štabova, službi zaštite i spašavanja, jedinica i povjerenici civilne zaštite dužni su obučavati se i osposobljavati za izvršavanje svojih zadataka u civilnoj zaštiti.

(4) Obučavanje i osposobljavanje građana iz stava (2) ovog člana i struktura civilne zaštite iz stava (3) ovog člana, koje organizuje Kanton obavlja Kantonalna uprava, dok obučavanje i osposobljavanje građana iz st. (1) i (2) ovog člana i struktura civilne zaštite iz stava (3) ovog člana, koje organizuje opština obavlja opštinska služba civilne zaštite.

(5) Obučavanje i osposobljavanje iz st. (1), (2) i (3) ovoga člana, vrši se po nastavnim planovima i programima koje donosi Direktor Federalne uprave civilne zaštite u skladu sa članom 164. Zakona o zaštiti i spašavanju.

Član 24.

(Obučavanje i osposobljavanje državnih službenika i namještenika)

(1) Kantonalna uprava, u saradnji s kantonalnim ministarstvima i drugim organima kantonalne uprave, u okviru njihovog djelokruga, obavlja obučavanje njihovih službenika i namještenika za ličnu i uzajamnu zaštitu.

(2) Opštinska služba civilne zaštite, u saradnji s opštinskim službama za upravu i drugim organima opštinske uprave, u okviru njihovog djelokruga, obavlja obučavanje njihovih službenika i namještenika za ličnu i uzajamnu zaštitu.

Član 25.

(Kantonalni centar za obuku)

Za potrebe obučavanja i osposobljavanja u skladu sa članom 165. Zakona o zaštiti i spašavanju, osniva se Kantonalni centar za obuku za zaštitu i spašavanje, koji se nalazi u sastavu Kantonalne uprave.

Član 26.

(Programiranje i planiranje)

(1) Organizovanje i provođenje zaštite i spašavanja od prirodnih i drugih nesreća obavlja se na osnovu programa razvoja, planova zaštite i spašavanja od prirodnih i drugih nesreća i drugih planskih dokumenata u skladu sa Zakonom o zaštiti i spašavanju i provedbenim propisima donesenim na osnovu tog Zakona.

(2) Glavni nosilac na izradi planskih dokumenata iz stava (1) ovog člana i ostvarivanju zadataka utvrđenih u njima u Kantonu je Kantonalna uprava, a u opštini, opštinska služba civilne zaštite.

POGLAVLJE VII – FINANSIRANJE I NAKNADE

Član 27.

(Izvor finansiranja)

Zaštita i spašavanje od prirodnih i drugih nesreća na području Kantona finansira se iz:

- a) budžeta Kantona i opština,
- b) sredstava pravnih lica,
- c) osiguranja,
- d) dobrovoljnih priloga,

- e) međunarodne pomoći i
- f) drugih izvora utvrđenih Zakonom o zaštiti i spašavanju, ovim Zakonom i drugim propisima.

Član 28.

(Posebna naknada za zaštitu i spašavanje)

(1) Sva pravna lica i građani, koji obavljaju samostalnu djelatnost i državni organi svih nivoa vlasti u Federaciji Bosne i Hercegovine, dužni su u skladu sa članom 180. Zakona o zaštiti i spašavanju plaćati posebnu naknadu za zaštitu od prirodnih i drugih nesreća u visini od 0,5 % od osnovice koju čine isplaćene neto plate zaposlenika u radnom odnosu i svih lica angažovanih po ugovoru o vršenju privremenih i povremenih poslova i po ugovoru o djelu.

(2) Raspodjela i namjena sredstava iz stava (1) ovog člana vrši se prema odredbama člana 180. Zakona o zaštiti i spašavanju.

Član 29.

(Budžetska sredstva i njihova namjena)

U Budžetu Kantona osiguravaju se potrebna sredstva za finansiranje obveza iz člana 183. Zakona o zaštiti i spašavanju, a u budžetima opština za obveze utvrđene u članu 184. Zakona o zaštiti i spašavanju.

Član 30.

(Dodatni prihodi)

(1) Kantonalna uprava i opštinske službe civilne zaštite na području Kantona, mogu ostvariti dodatne prihode od obavljanja svoje osnovne djelatnosti, koji će služiti isključivo za finansiranje potreba iz čl. 183. i 184. Zakona o zaštiti i spašavanju.

(2) Sredstva namijenjena za finansiranje zaštite i spašavanja, propisana posebnim znakom, kao što je „markica solidarnosti“ ili dio naplaćene premije osiguranja od požara i druga sredstva predviđena za te namjene, naplaćuju se i koriste za potrebe zaštite i spašavanja utvrđene Zakonom o zaštiti i spašavanju i ovim Zakonom.

Član 31.

(Finansijska sredstva potrebna za finansiranje zaštite i spašavanja u pravnim licima)

Pravna lica iz vlastitih sredstava finansiraju troškove koji se odnose na pripremanje i opremanje štabova, povjerenika i jedinica civilne zaštite, koje osnivaju radi zaštite i spašavanja vlastitog ljudstva, imovine i drugih materijalnih dobara od opasnosti i djelovanja prirodnih i drugih nesreća.

Član 32.

(Naknade u civilnoj zaštiti)

Pitanja koja se odnose na uslove i način ostvarivanja naknada u oblasti zaštite i spašavanja, regulisana su u odredbama čl. 186. do 189. Zakona o zaštiti i spašavanju.

POGLAVLJE VIII PRIJELAZNE I ZAVRŠNE ODREDBE

Član 33. (Ravnopravnost spolova)

Gramatička terminologija u ovom Zakonu podrazumijeva uključivanje oba spola.

Član 34. (Stupanje na snagu)

Ovaj Zakon stupa na snagu osmog dana od dana objavljivanja u „Službenim novinama Kantona Sarajevo“.

Broj 01-02-32596/08
4. decembra 2008. godine
Sarajevo

Predsjedavajući
Skupštine Kantona Sarajevo
dr. **Denis Zvizdić**, s. r.
